

Tixrdo Sul

1

¹ Tixrdo, ngo mel Barloxr a. Ngo mel Arbosobo leil visser su nei Yisu Zidu miardal dae ca ddei a. Arbosobo ngo leil miardal a yar tiur har dae ca mel leil beijiu a, yar ddei ddar mel leil ddarzzi lol nei yar ddei ddarzi mel leil saexl lol, yel yaa leil Arbosobo leil i du lol. ² Yaa mel Arbosobo leil ddarzzi halae yar ddei ddarzi mel leil saexl, yel yaa cirse-cirsil lei Arbosobo dax hher dax dae loxia. Ca leil nr fur lei Arbosobo ddei mel azo lei nr zza seir dder yar ddei cassor-worssor mel cirse-cirsil olga zza bbeix har zaxr dae ho a. ³ Arbosobo dixl har dae nixixl ddei ci a, yar ca mel leil yar ddei ddar mel leil saexl lol a. Niul leil jiuxlsu Arbosobo dder ngo leil miardal teixl lei a yar ddei ddar mel ca leil biar gger ssi lol.

⁴ Ngo ni leil xil vaexr gger. Ni mel ngo saelsael a Yisu leil ddarzzi a, ni ngo ddei ssorga sael a nga. Niul ddei Arbbor Arbosobo nei niul leil jiuxlsu Yisu Zidu ni leil cirza-hanga seirseir mel meixl gger lol nia, ni leil nixmox zzaso lol nia.

Tixrdo Kellirtexl Dal Halmaex Hher Dae A Miar Bei Dae Mel Leil Biar

⁵ Ngo ni leil Kellirtexl dal hal taex leil hher dae lol a mel, ni leil niul bei nr jjia miar mel maermaer-ssissi a bei lol, halae yoxl zzi cirddeir-hanga jiaxlhuixl gga ca leil guaxr su camar tiur lol. Ngo mel halleix dder ni leil eil mel miardal goxr a. ⁶ Jiaxlhuixl gga ca leil guaxr su camar mel botaddu cir doxr lei nr zza, yar maerssor cir ddeir a zza, yar anix mel lei Yisu leil ddarzzi. Kebal ca mel lei yar ddei anix mel ca pia bbeixsael mul vu nr ssi eine bbeix su nr zza. ⁷ Yar Arbosobo ddei jiaxlhuixl leil guaxr a mel, botaddu cirdoxr lei zza nr ddo. Yar nr col, seifu nr vaer, zzibbaer dda nr yixr, ca nr deil, zzirbae sei-nr-beix mel nr tuxr. ⁸ Piar nr

saexl ca mel leil hexl meixr nia, seirseir bei meixr nia, azo bei lei barver nia, nixmox cirtaex-lorbba Arbosobo dax bei mae dae nia, armael leil guaxr ssei xie nia. ⁹Ca leil mul gger labox ddarzi mel nixmox zzar ji dae. Eine nga a mel yar dder ddarzi mel sser a ca mel leil quex cexr, halae ddarzi mel leil dir su ca mel leil yaa nr hoxr saexl lol cexr.

¹⁰Ca cirke a mel Arbosobo ddei ddar noni nr yuex, yel yaa nrbba nrbba ddar mel bbeix a ca leil fur. Yisu leil ddarzzi su mel gelir bei nia bbeix su Yoxrtaexl su ca hal mel gielgiel eine nga. ¹¹Yaa mel zzirbae sei-nr-beix mel leil tuxr a nr hoxr hal mel ca leil mul gger a, yaa si ddei ake ca cirhhexr-lorbba leil ddarzi mel leil ddar-nr-zzi lol, yel ni ca eil mel leil ddar bbeix lol nr ddo. ¹²Halleix Kellirtexl dal halmaex su xiezi ar ddei a bbeix goxr a bbeix: “Kellirtexl dal halmaex su ca mel zoxlzoxl a ca fur, yaa cinil sael a nga, bbae zzae bbaeyo, meir zzae meirne.” ¹³Yar bbeix dae ddar mel cirdoxr lei bbeix nr cox, yel ni halmaex su Yisu leil ddarzzi su mel leil larhorhormo bota a, yaa leil ddarzi mel leil zabbar seirseir a ddarzzi lol, ¹⁴yaa leil Yoxrtaexl su mel nrbba nrbba biar dae gurlir nei ddarzi mel leil dir su ca mel miardal dae hal mel leil zeixleixr lei no-nr-ni lol. ¹⁵Nixmox zzar seibeix su ca mel dax mel cirza-hanga lei seibeix. Nael Arbosobo leil ddar-nr-zzi a nixmox zzar sei-nr-beix su ca mel dax mel azo lei sei-nr-beix. Yaa nixmox taex lei neix gaxzi ho a.^a ¹⁶Yaa meir ddei nael bbeix Arbosobo leil ddarzzi, nael yaa bei dae mel mel Arbosobo leil ddar-nr-zzi su mel dax ciryoxr a nga. Arbosobo ddei ddar lei no-nr-ni, yaa azo seirseir bei teixl lei nr xie, Arbosobo yaa leil yarzi

^a**1:15** Nixmox zzar seibeix su ca mel yaa nixmox seir, yaa Arbosobo leil ddarzzi, yar dax bei mae dae, yel yaa azo lerler lei zzor cexr, dda cexr. Nixmox zzar sei-nr-beix su ca mel, nixmox yarzi neix, Arbosobo leil ddar-nr-zzi, yar dax bei nr mae, yel yaa dax mel zzor nr ddo, dda nr ddo, bei nr ddo cirke zza.

vuxryixr.

2

Ddarzi Mel Ca Leil Mul Gger

¹ Tixrdo, ni ca leil mul gger a mel, zabbar seilseir a hoxr hoxr mel mul gger nia. ² Ni capormar mel leil eine quex nia: zzipbaer dda yixr nr ddo, azo bei lei bar velper a bei, armael leil guaxr ssei xie, zabbar seilseir a Arbosobo leil ddarzzi, ca leil perniar, ssertexr zza. Eine nga a mel ca mel dder yar leil i du a.

³ Ciryoxr a nga, ni yoxl arpirmar mel leil lei eine quex nia: si leil bbeix no nr ddo, zzipbaer ddayixrboxr bei nr ddo, ddar seirseir mel ca leil mul gger, yaa nixixl goxr a eine goxr a mel dder Arbosobo leil yarzi sael i du a. ⁴ Eine nga a mel yaa dder koxltor nor seir ssormaer mel leil mul gger cexr, yel yaa leil capor leil nei aniux leil perniar lol, ⁵ yaa leil armael leil guaxr ssei xie lol, nixmox zzar seirseir mel lar xiar, zabbar seilseir a ake guaxr lol, seirseir mel bei, capor ddei ddar no lol. Yaa armael leil eine guaxr ssei xie a mel ca mel dder Arbosobo ddei ddar mel leil bbeix vuxryixr nr var.

⁶ Ciryoxr a nga, ni koxltor nor seir capor mel leil lei armael leil guaxr ssei xie nia eine quex nia. ⁷⁻⁸ Ni Arbosobo leil weix a, ca lei mul gger a mel zabbar seilseir a hoxr hoxr mel mul gger nia. Ddar bbeix a mel mabbabba a bbeix nia. Eine nga a mel ca mel dder ni leil botaddu nr zza a. Ni azo bei lei seirseir bei nia, ca mel lei ni leil i dae a, seirseir bei var. Yel niul leil dir su mel dder niul arddolmaex nr hoxr zo teixl lei nr xie a, qiaxrmeix zzi nr zza a dder ddar bbeixddu nr zza a.

⁹ Ni zebol mel leil eine quex nia: yaa seirpor bbeix dae hazza lei noni, azo bei lei yaa seirpor leil i lal lol, yaa seirpor dax zex nr ddo, ¹⁰ seirpor ddei azo lerler ker nr ddo, azo bei lei mabbabba a bei a seirpor ddei leil

yaa leil ddarzzi lol, yel kebal ca mel yaa azo lerler bei ggie mia a dder niul leil jiuxlsu Arbosobo ddei ddar mel leil yarzi i du a.

¹¹⁻¹² Niul mer woxrke cassor-worssor mel leil Arbosobo jiuxl nr piar bbeixarnar, nael yar halae niul leil jiuxl, niul leil saexl lol ho a. Yar niul leil cirza-hanga seirseir mel meixl gger a mel, niul leil mul gger a, yar leil i nr du bei dae mel nr bei lol halae middurbbor cirza-hanga nr seir xiar dae mel dax bei nr mae lol. Middurbbor nixixl goxr a armael leil guaxr ssei xie, nixmox seir nei Arbosobo leil yarzi sael i du lol. ¹³ Niul mel nixixl goxr a eine goxr dae a, yarzi sael nixixl seirseir hal cir ni goxr ci loxia. Nixixl hal cir ni ci a mel, arseir lei yarzi sael i du Arbosobo hherdder niul leil jiuxlsu Yisu Zidu mel bbobbolbbo jjixr lei a niul leil mia lol du a.

¹⁴ Zidu niul leil weix a olga ddei lei pixl, niul leil cirza-hanga zuixl gga jiuxl teixl lei a mel, niul leil nixmox zzar seir gaxzi lol, zabbar seirseir a seirseir mel bei ssi lol a, yar ddei cassor-worssor bei lol. Yel ni ca mel leil ngo xilmeir ni leil mul gger dae mel sael a quex nia.

¹⁵ Ni Yisu leil ddarzzi su mel leil eil mel biar gger nia. Ni ddei quexrlixl mel sser a yaa leil bota nia, yaa leil nixmox dder vaer nia, ca mel leil ni leil i zeil lol nr ddo.

3

Yisu Leil Ddarzzi Su Mel Arsae Lerler Bei Nia

¹ Ni ca mel leil bbeix gger nia, vaervaerpor mel leil dir nr ddo, yaa miardal dae mel noni, arddolcar a lei cirza-hanga seirseir bei. ² Ni yaa leil quex nia, ca leil bbeix vuxryixr nr ddo, si dax zex nr ddo, si dax toltor a bei lalddo, ca cirddeir-hanga dax lei col nr ddo.

³ Halleix mel niul lei azo lei nr saexl, Arbosobo ddei ddar nr no, kebal ca mel leil niul leil fur lol, niul armael lo lei nr zza, cirza-hanga nr seir bei meixr nei gaxggor meixr lalnga. Nixixl goxr a lei nixmox yarzi neix,

ca leil nixnox, yarzi vuxryixrddo, niul ca mel lei zzicarzzi leil vuxryixr.

⁴Niul eine nga bbeixarnar, nael niul leil jiuxlsu Arbosobo mel halae niul leil zoxlnixr, niul leil perniar a, niul leil jiuxl lei a. ⁵Yar niul leil jiuxl a mel niul azo seirseir bei nr nga a nei, yar niul leil zoxlnixr a nga arddeir a.

Yar, yar ddei Xiu ddei niul leil gger a niul nixmox zzar nr seir mel cir xia gger, halae niul nixmox ddei gierbox gger, niul leil olga sixl ar ddei gger.

⁶Niul, niul leil jiuxlsu Yisu Zidu leil ddarzzi a, yar yar ddei Xiu ddei niul nixmox zzar bbilbbi hher ji dae lol a. ⁷Yar eine bei a mel niul leil yar ddei aniux bei lol, niul dder cirse-cirsil yar dax goxr dae loxia cexr. Niul yar ddei aniux bei cexr a mel, yar niul leil cirza-hanga seirseir mel meixl gger a niul leil zuixl nr zza i mal gger a nga arddeir a. ⁸Ngo bbeix dae ddar eil mel mel ddarzziddo. Yel ni Arbosobo leil ddarzzi su ca mel leil zoxlzoxl a biar gger a, yaa leil zabbar seirseir a seirseir bei ssi lol. Ddar eil mel mel ca leil seir lol var.

⁹Nael ni Yoxrtaexl su ddei cir zeix cir zeix porpor mel leil nei Yoxrtaexl su ddei Lixlfxar mel leil weix a ca dax zex nr ddo. Eil mel leil zex a mel azo seirggiebbær nr zza, zex caxr nr zza. ¹⁰Zex su zza arddeirnga a, ni yaa leil cir nr boxl bota nia. Yaa halae ni ddar nr no a mel, ni dder yaa dax naer nr ddo. ¹¹Ni lei saexl, zex su ca eil mel mel dexryixl ddarzi mel leil dir, zuixl bei a armael leil zuixl dixl gger.

Tixrdo Leil Miardal Nei Ca Mel Leil Seirseir Dae Biex

¹²Ngo Nixrgebolil zzi gga zzixzi goxr niazzir dae, yel ngo Yaltimar leil bbeixsael Tuizigur leil zi a ni dax lei lol car, ni dder nialngasael ngo leil i lei. ¹³Xinal nei Yalboloxr yaa kebal mermi ssi car, ni arsae bei var yaa leil arsae beijjiu, yel yaa leil azo sser zoxr mel dder azo sserddu zza lol. Xinal mel Lixlfxar saexl su ar ddei a. ¹⁴Niul mel zabbar seirseir a seirseir bei zza nia. Eine nga a mel ca leil azo beijjiu zoxr mel niul dder beijjiu cexr, ca cexr nr ddo loxr nr var.

¹⁵ Ngo dax cirgo a ca mel lei ni leil zzasoso dae biex dae. Ni leil qie ni niul dax cirgo a Yisu leil ddarzzi a ngua leil perniar su ca mel leil zzasoso dae biex gger ssi. Arbosobo nia daxrhoxr leil seirseir mel meixl gger lol nia!